

je hišće Hnašečanska šula wostała. a) Cyrkwinska šula w Huscy: wsy 1—13 a Demjany z džěła; 413 džěći; 3 wučerjo (2 statnej [Serbaj] a 1 pomocny [Němc]); tu hišće te serbske džěći, kotrež so na prašenje wučerjow wo to zamołwjeju, ze serbskeje biblije za tydžeń raz serbski čitaju; hewak je wša wučba, tež w nabožinje, štož je nam wědome, prostoněmska. — b) Pódlanska šula w Drječčinje: wsy 15—17 a Demjany z džěła; 120 džěći; 1 wučer. Tu wuči so wot dawnych časow hižo němski a wot l. 1885 je tu nětko tež němski wučer (vikar) postajeny. — c) Pódlanska šula w Hnašecach: wsy 18—20 a k tomu Čěchorecy (z Hodžijskeje) a Hrubjelčicy a Dobruša (z Budyšskeje serbskeje wosady); 197 džěći; 1 wučer; nabožina a čitanje drje so tu serbskim džěćom hišće serbski podawa. Wjes Brězyšćo je do Zemic-Tumic zašulowana. — W Ramming, Handbuch der Schulstatistik 1885 je Husčanska šula jako „němsko-serbska“, Drječinska jako „němska“, a Hnašečanska jako „serbsko-němska“ woznamjenjena.

Wučerjo: I. w Huscy: a) přeni wučer: 1) Tietze, Němc z Drježdžanskeje strony — 1833; 2) Korla Bjedrich Esbig, rodź. 1800 na Židowje, Němc, 1833 —?; 3) Pětr Nowak, rodź. 1803 na Sokolcy, Serb, — 1866; tutón so sam z tym khwaleše, zo je wjele za přeněmcowanje Husčanskeje šule a wosady skutkował a wuskutkował; 4) wot 1866 kantor Jan Aug. Ludwig, * 24. sept. 1837 w Dobruši, 1857 pomocny wučer w Barće, 1860 druhi wučer na Židowje, 1864 wuč. w H. Wjelečinje; — b) druhi wučer: wot 1874 Jan Bohuwěr Guda, * 12. aug. 1843 w Komorowje p. Klukša, 1865 vikar, 1867 druhi wučer na Židowje; — c) pomocny wučer (Němc). — II. W Drječčinje: 1) wot 1844—85 Michał Rostok, * 1821 w Bělšecach; 2) wot 1885 němski vikar. — III. W Hnašecach: wot 1875 Moric Gustav Wolff (Wjelk), * 29. nov. 1844 w Stróži p. Rakec, 1865 pomocny wučer w Krjebi, 1867 wučer w Wětnicy.

Wobydleństwo: Njedostawši z tuteje wosady dotal žanych powěsći njemóžu nič drobnišo wo njej pisać, hač štož ze samsneho nazhonjenja wěm. Dokelž wosada k połodnju z džěła z němskej Wjazonskej wosadu mjezuje a dokelž so wot dawna w cyrkwi a šuli wjele němcowaše, su so tež někotre wsy nimale zněmčile a druhe naněmčile a tež w hišće serbskich wsach su wšelacy Serbja, předewšěm mjez młodymi, kiž so radšo za Němcow a k Němcam dđerža. To pokazuje so wosebje při zjawnych